

Vischnaunca politica Andiastr

Radunonza communal dils 21 d'uost 2009

1. Beinvegni ed elecziun dil dumbravuschs

President communal Sievi Sgier fa in cordial beinvegni. Sco dumbravuschs vegnan Priska Capaul e Curdin Vincenz proponi ed elegi. Encunter la gliesta da tractandas dat ei neginas objecziuns.

2. Prelecziun ed aprobaziun dil protocol dils 22 da matg 2009

Il protocol dalla davosa radunonza communal dils 22 da matg 2009 vegn prelegius ed approbaus unanimamein.

3. Elecziuns per la perioda d'uffeci 2009/10

A caschun dallas radunonzas dils 24 d'october 2008 e 28 da november 2008 han buca tut ils uffecis communalis saviu vegnir occupai. Ei resta d'eleger ils sequents officials da vischnaunca:

- 2 suprastont(a)s
- 1 suppleant(a)s da suprastonza
- 1 revisur(a)s da quen
- 2 suppleant(a)s dils revisurs

Ord miez dils vischins vegn fatg neginas propostas. President Sievi Sgier pren enconuschientscha che negin en sala ei promts da suprender in uffeci. El fa attents che las elecziuns vegnan danovamein tractandadas a caschun dalla proxima radunonza communal.

4. Damonda da credit per la sanaziun dalla via dall'Alp Miez

L'entschatta matg 2009 ei vegniu giu in sbuau davart encunter sera dallas stallas ell'Alp d'Andiastr. La via d'access per l'Alp Sura ei sesbassada tochen 1 m. La via el territori da distaccaziun ei vegnida donnegiada taluisa, ch'ella ha stuiu vegnir rinforzada cun canasters da lenna. Medemamein ei vegniu donnegiau ina lingia d'aua e la lingia da latg. La lingia d'aua rutta ha augmentau igl effect dil sbuau.

La suprastonza communal ha sinaquei incaricau il biro GeoConCav da Castrisch cun l'examinaziun dil sbuau. Tenor rapport dil zercladur 2009 ei vegniu cussegliu dad exerquir immediatamein las lavurs da sanaziun, era per impedir novs sbuaus en futur (reactivaziun dil sbuau entras plievgia eav).

Las lavurs ein gia vegnidas exequidas el decuors dils meins matg e zercladur. Ils cuosts totals ei vegni calculai cun frs. 60'000.00. Ina damonda per in sustegn finanziel ei gia vegnida tschentada al Padrinadi svizzer per vischnauncas muntagnardas. La risposta dil Padrinadi ei aunc pendent.

La suprastanza communal fa la proposta da conceder posteriurmein in credit ell'altezia da frs. 60'000.00.

Il credit necessari ell'altezia da frs. 60'000.00 vegn concedius cun 28 vuschs encunter 1 vusch.

5. Damonda da credit per in local/stanza da deposit en casa da scola

Las lavurs da sanaziun e remodernisaziun dalla casa da scola ein vegnidas terminadas la primavera vargada. Las empremas colonias han gia saviu prender a tscheins las localitads. Il resun ei staus diltuttatfatg positivs.

Sco ins ha viu igl unviern vargau ei la situaziun per deponer igl uorden dallas colonias (skis, aissas, calziers da skis/aissa, velos eav.) buc ideala. Tal uorden vegneva deponius en zulèr nua l'entrada dalla casa da scola (entrada plaz posta). Per saver optimar quei fatg preveda la suprastanza communal da dislocar la canzlia egl anteriur local da posta e funcziunar entuorn il biro da canzlia actual en ina stanza da deposit.

Ils cuosts per ina tal project san vegnir calculai cun frs. 10'000.00. La suprastanza communal fa la proposta da conceder il credit necessari da frs. 10'000.00.

La radunonza communal conceda il credit cun 15 vuschs encunter 2 vuschs.

6. Orientaziun ed discussiun davart il futur da nossa vischnaunca

El contuorn dalla Foppa e dalla Lumnezia marschan diversas discussiuns en connex cun fusiuns gia dapi entgin temps. Medemamein ha la Regiun Surselva installau ina gruppa da lavur che s'occupescha cun quella tematica fetg actuala. Ord quei motiv ha la suprastanza communal d'Andiast vuliu endriescher il meini dils vischins en caussa.

Igl ei vegniu menau ina viva discussiun davart igl avegnir, respectivamein las pusseivladads e finamiras d'ina fusiun cun ina ni pliras autras vischnauncas. Dalla discussiun ei sortiu, ch'ina fusiun ei necessaria. Tenor il meini dils vischins duei vegnir tenuu en egl la varianta ensiviars encunter Breil, respectivamein quella engiuviers en direcziun Rueun. Igl ei vegniu giavischau da contactar las vischnauncas romontschas dil cumun da Rueun.

7. Varia

Donaziuns dil Padrinadi Svizzer per projects: President Sievi Sgier informescha davart las donaziuns dil Padrinadi svizzer per vischnauncas muntagnardas. Numnadamein ha la vischnaunca d'Andiast retschert ina summa da frs. 125'200.00 per la remodernisaziun dalla casa da scola e frs. 80'000.00 per la sanaziun dallas vias da rundaziun.

Projects sin rucca: President Sievi Sgier informescha davart ils projects ch'ei sin rucca, numnadamein in'ulteriura etappa dalla sanaziun dallas vias da funs. Plinavon vegn la fa. Burkhalter, la quala ha fatg il plaz da seser a Quadras, a far ina fueina ed in begl el medem liug. Sco davos ei aunc previu da rugalar il trutg da Clavau Griu - Camartgin. La scola superiura da Rueun vegn plinavon a rugalar il plaz da giug sut scola.

Canals en las vias da funs: Ord miez dils vischins vegn fatg attents sillas canals che ein vegnidas installadas en connex cun la sanaziun dallas vias da funs. Quellas han ina pli lada sfessa che las canals veglias. Tier in animal pign ei il prighel da sefar mal avon maun, sche tal passa viaden en ina sfessa. Ei sa vegnir informau che la ladezia da quellas canals seigi dada avon digl inschignier, sebasond sin las normas vertentas.

Santeri: Ord miez dils vischins vegn fatg attents sil reglament da santeri. En tal seigi prescret ch'il temps da ruaus munti a 20 onns. En santeri detti ei denton fossas che seigien pli veglias. President Sievi Sgier sa comunicar che sch'il giavisch ei avon maun vegnan quellas fossas allontanadas.

Andiast, ils 21 d'uost 2009

Il president:

Igl actuar:

Sievi Sgier

Giovanni Damiano